

小學考

小學考卷十四

資政大夫兵部侍郎兼都察院右副都御史巡撫廣西南康謝啟昆編

文字六

何氏

承天纂文

七錄三卷

佚

宋書何承天傳曰承天東海剡人也五歲失父母徐氏廣之姊也聰明博學故承天幼漸訓義儒史百家莫不該覽爲參軍出補宛陵令轉西中郎中軍參軍錢唐令召爲尚書祠部郎與傅亮共謨朝儀補南臺治書侍御史補尚書殿中郎兼左丞出爲衡陽內史

爲州司所糾繫獄值赦免除著作佐郎謫國史領國
子博士遷廷尉免官卒於家先是禮論有八百卷承
天刪減合并以類相從爲三百卷并前傳襍論纂文
論竝傳於世又考定元嘉厯

按南史劉杳傳引纂文張仲師長頸王二事
又文選注引云書縑曰素霈雲若大波他若
初學記一切經音義所引甚多

顏氏延之纂要

唐志六卷

佚

宋書顏延之傳曰延之字延年琅邪臨沂人也少孤

貧好讀書無所不覽文章之美冠絕常時爲行參軍
轉主簿遷舍人徙尚書儀曹郎太子中舍人徙員外
常侍出爲始安太守領軍將軍徵爲中書侍郎轉太
子中庶子頃之領步兵校尉出爲永嘉太守屏居里
巷起爲御史中丞遷國子祭酒復爲祕書監光祿勳
太常世祖登阼以爲金紫光祿大夫卒贈散騎常侍
特追金紫光祿大夫諡曰憲凡所著並傳於後

按山東通志經籍有何承天爾雅纂文十卷
顏延之爾雅纂要一卷卽纂文纂要二書蓋
其體侶爾雅遂妄加二字於上也

李氏鉉字辨

見北齊書

佚

北齊書儒林傳曰李鉉字寶鼎渤海南皮人也九歲入學書急就篇月餘便通家素貧苦常春夏務農冬乃入學年十六從浮陽李周仁受毛詩尚書章武劉子猛受禮記常山房虬受周官儀禮漁陽鮮于靈複受左氏春秋鉉以鄉里無可師者遂與州里楊元懿河間宗惠振等結侶詣大儒徐遵明受業居徐門下五年常稱高第二十三便自潛居討論是非譔定孝經論語毛詩三禮義疏及三傳異同周易義例合三十餘卷用心精苦曾三冬不畜枕每至睡時假寐而

己年二十七歸養二親因教授鄉里生徒恆至數百
燕趙閒能言經者多出其門年三十六丁父喪服闋
以鄉里寡文籍來遊京師讀所未見書州舉秀才除
太學博士武定中李同軌卒後高祖令世宗在京妙
簡碩學以教諸子世宗以鉉應旨徵詣晉陽時中山
石曜北平陽絢北海王晞清河崔瞻廣平宋欽道及
工書人韓毅同在東館師友諸王鉉以去聖久遠文
字多有乖謬感孔子必也正名之言乃喟然有刊正
之義於講授之暇遂覽說文爰及倉雅刪正六藝經
注中謬字名曰字辨天保初詔鉉與殿中尙書邢邵
中書令魏收等參議禮律仍監國子博士時詔北平

太守宋景業西河太守綦母懷文等草定新厯錄尚
書平原王高隆之令鉉與通直常侍房延祐國子博
士刁柔參考得失尋正國子博士廢帝之在東宮顯
祖詔鉉以經入授甚見優禮數年病卒特贈廷尉少
卿

江氏式古今文字

四十卷見魏書及北史

佚

北史江式傳曰式字法安陳留濟陽人也六世祖瓊
字孟琚晉馮翊太守善蟲篆詁訓永嘉大亂瓊棄官
授長軌子孫因居涼土世傳家業祖強字文威涼州

平內徙代京上書三十餘法各有體例又獻經史諸
子千餘卷由是拜中書博士卒贈燉煌太守父紹興
高允奏爲祕書郎掌國史二十餘年以謹厚稱卒於
趙郡太守式少專家學數年中常夢兩人時相教授
及寤每有記識初拜司徒長史兼行參軍檢校御史
尋除符節令以書文昭太后尊號謚冊除奉朝請仍
符節令篆體尤工洛京宮殿諸門版題皆式書也延
昌三年三月式表云云詔曰可如所請併就太常兼
教八書史也其有所須依請給之名目待書成重開
式於是譔集字書號曰古今文字凡四十卷大體依
許氏說文爲本上篆下隸正光中兼著作郎卒官贈

巴州刺史其書竟未能成式兄子征虜將軍順和亦工篆書先是太和中兗州人沈法會能隸書宣武之在東宮敕法會侍書後以隸迹見知於閭里者甚眾未有如崔浩之妙

式表曰臣聞伏羲氏作而八卦形其畫軒轅氏興而靈龜彰其彩古史蒼頡覽二象之爻觀鳥獸之迹別勑文字以代結繩用書契以維事宜之王迹則百工以敘載之方冊則萬品以明迄於三代厥體頗異雖依類取制未能殊蒼氏矣故周禮八歲入小學保氏教國子以六書一曰指事二曰象形三曰諧聲四曰會意五曰轉注六曰假借蓋是史頡之遺法及宣王

太史史籀著大篆十五篇與古文或同或異時人同爲之籀書孔子修六經左邱明述春秋皆以古文厥意可得而言其後七國殊軌文字乖別暨秦兼天下丞相李斯乃奏蠲罷不合秦文者斯作倉頡篇車府令趙高作爰歷篇太史令胡毋敬作博學篇皆取史籀式頗有省改所謂小篆者也於是秦燒經書者滌除舊典官獄繁多以趣約易始用隸書古文由此息矣隸書者始皇使下杜人程邈附於小篆所作也世人以邈徒隸卽謂之隸書故秦有八體一曰大篆二曰小篆三曰符書四曰蟲書五曰摹印六曰署書七曰殳書八曰隸書漢興有尉律學復教以籀書又習

八體試之課最以爲尙書吏書省字不正輒舉劾焉
又有草書莫知誰始其書雖無厥誼亦是一時之變
通也孝宣時召通倉頡讀者獨張敞從受之涼州刺
史杜業沛人爰禮講學大夫秦近亦能言之孝平時
徵禮等百餘人說文字於未央宮中以禮爲小學元
士黃門侍郎楊雄采以作訓纂篇及亡新居攝自以
運應制作大司馬甄豐校文字之部頗改定古文時
有六書一曰古文孔子壁中書也二曰奇字卽古文
而異者三曰篆書云小篆也四曰佐書秦隸書也五
曰繆篆所以摹印也六曰鳥蟲所以幡信也壁中書
者魯恭王壞孔子宅而得尙書春秋論語孝經也又

平北侯張倉獻春秋左氏傳書體與孔子相類卽前代之古文矣後漢郎中扶風曹喜號曰工篆小異斯法而甚精巧自是後學皆其法也又詔侍中賈逵修理舊文殊藝異術王敎一端苟有可以加於國者靡不悉集逵卽汝南許慎古學之師也後慎嗟時人之好奇歎俗儒之穿鑿故譔說文解字十五篇首一終亥各有部屬可謂類聚羣分雜而不越文質彬彬最可得而論也左中郎將陳畱蔡邕采李斯曹喜之法爲古今雜形詔於太學立石碑刊載五經題書楷法多是邕書也後開鴻都書畫奇能莫不雲集時諸方獻篆無出邕者魏初博士清河張揖著埤倉廣雅古

今字詁究諸埤廣綴拾遺漏增長事類抑亦於文爲益者然其字詁方之許篇古今體用或得或失陳畱邯鄲淳亦與揖同博聞古藝特善倉雅許氏字指八體六書精究閒理有名於揖以書教諸皇氏又建三字石經於漢碑西其文蔚煥三體復宣校之說文篆隸大同而古字少異又有京兆韋誕河東衛覬三家竝號能篆當時臺觀勝題寶器之銘悉是誕書咸傳之子孫世稱其妙晉世義陽王典詞令任城呂忱表上字林六卷尋其况趣附託許慎說文而按偶章句隱別古籀奇惑之字文得正隸不差篆意也忱弟靜別放故左校令李登聲類之法作韻集五卷使宮商

鰥徵羽各爲一篇而文字與兄便是魯衛音讀楚夏
時有不同皇魏承百王之季紹五運之箸世易風移
文字改變篆形謬錯隸體失真俗學鄙習復加虛造
巧談辨士以意爲疑炫惑於時難以釐改乃曰迫來
爲歸巧言爲辯小兔爲鸛神蟲爲蠶如斯甚眾皆不
合孔氏古書史籀大篆許氏說文石經三字也凡所
關古莫不惆悵焉嗟夫文字者六籍之宗王教之始
前人所以垂今今人所以識古臣六世祖瓊家世陳
畱往晉之初與從父兄俱受學於魏覲古篆之法倉
雅方言說文之誼當時竝收善譽而祖遇洛陽之亂
避地河西數世傳習斯業所以不墜也世祖太延中

牧犍內附臣亡祖文威杖策歸國奉獻五世傳掌之
書古篆八體之法時蒙褒錄敘列於儒林官班文省
家號世業暨臣闇短識學庸薄漸漬家風有忝無顯
是籍六世之資奉遵祖考之訓竊慕古人之軌企踐
儒門之轍求謨集古來文字以許慎說文爲主及孔
氏尙書五經音注籀篇爾雅三倉凡將方言通俗文
祖文宗埤倉廣雅古今字詁三字石經字林韻集諸
賦文字有六書之誼者以類篇聯文無復重統爲一
部其古籀奇惑俗隸諸體咸使班於篆下各有區別
詁訓假借之誼僉隨文而解音讀楚夏之聲竝逐字
而注其所不知者則闕如也脫蒙遂許冀省百代之

觀而同文字之域典書祕書所須之書乞垂敕給并
學士五人嘗習文字者助臣披覽書生各五人專令
鈔寫侍中黃門國子祭酒一月一監誣議疑隱庶無
紕繆所譔名目伏聽明旨

魏太祖眾文經

見魏書

佚

魏書太祖紀曰天興四年集博士儒生比眾經文字
義類相從凡四萬餘字號曰眾文經

魏世祖新字

見魏書

佚

魏書世祖紀曰始光元年初造新字千餘詔曰昔在帝軒翬製造物乃命蒼頡因鳥獸之迹以立文字自茲以降隨時改作故篆隸草楷竝行於世然經歷久遠傳習多失其眞故令文體錯謬會義不愜非所以示軌則於來世也孔子曰名不正則事不成此之謂矣今制定文字世取用者頒下遠近永爲楷式

阮氏孝緒文字集略

隋志六卷

佚

隋書經籍志曰梁文貞處士阮孝緒撰